

CONFIRMATIO DECLARATIONVM

Congregationis Concilij super cognitione causarum Regularium.



PAVLVS PAPA V.

AD FVTVRAM REI MEMORIAM.



Religiosorum sub graui Religionis iugo Altissimo famulantium quieti prospicere cupientes, quæ illam quoquo modo perturbare posse videntur, opportuna nostra declaratione è medio tollere, ac aliàs desuper opportunè prouidere curamus, prout in Domino salubriter conspiciamus expedire. Cum itaq; nomine dilecti filij Basilij Angussolæ Procuratoris Generalis Ordinis Fratrum Carmelitarum in Congregatione Venerabilium Fratrum nostrorum S. R. E. Cardinalium Tridentini Concilij interpretum, expositum fuerit, in Hispaniarum Regnis quosdam Ordinarios Locorum contendere, Religiosos intra claustra degentes coram ipsis Ordinarijs conuenire debere in causis ciuilibus, cap. Volentes, de priuilegijs in sexto comprehensis, propter illius inuocationem à Concilio Tridentino factam, sessione septima, cap. xiiij. quo præfatos Religiosos, eorum priuilegijs abrogatis, defendunt comprehendi. Præterea eosdem Locorum Ordinarios pariter contendere eosdem Religiosos intra claustra degentes in prima instantia coram ipsis conueniri debere ex decreto eiusdem Concilij Tridentini, sessione xxiiij. cap. xx. de Reformatione; Cumquæ ab eodem Basilio Procuratore Generali in eadem Congregatione supplicatum fuerit, vt super vtraq; re responsa darentur Ab eadem verò Congregatione fuerit responsum, Neq; constitutione in Concilio Lugdunensi edita, quæ incipit Volentes, neq; decreto Concilij Tridentini cap. xiiij. sess. vij. comprehendi Regulares, ideoq; eos iuxta eorum priuilegia coram suis Superioribus, vel Conseruatoribus esse conueniendos. Necnon Decretum eiusdem Concilij Tridentini dicto cap. xx. sess. xxiiij. ad Regulares non pertinere, nec eorum Conseruatorias imminuere, nec quoad primam illarum instantiam, aliquid noui inducere, ipseq; Basilius Procurator Generalis nobis humiliter supplicari fecerit, vt pro sui ordinis quiete, supradictas declarationes ab eisdem Locorum Ordinarijs seruari debere, Apostolica auctoritate præcipere dignaremur. Nos, illius huiusmodi supplicationibus inclinari; omnibus, & singulis Locorum Ordinarijs in virtute sanctæ obedientiæ per præsentem districtè præcipiendo mandamus, ne Fratres, & Religiosos dicti Ordinis Carmelitarum contra dispositionem Declarationum prædictarum perturbare, vel inquietare quoquo modo audeant, vel præsumant; irritum nihilominus & inane decernentes quicquid secus super his à quoquam quauis auctoritate scienter, vel ignoranter contigerit attentari: Quocirca dilectis filijs causarum Curia Camera Apostolicæ Generali Auditori, & nostro, & Apostolicæ Sedis in Regnis Hispaniarum Nuncio per præsentem committimus, & mandamus, quatenus ipsi, vel alter eorum præsentem litteras, & in eis contenta quæcunq; vbi, & quando opus fuerit, & quoties pro parte dictorum Religiosorum, eorumuè Superiorum fuerint requisiti solemniter publicantes, eisq; in præmissis efficacis defensionis præsidio assistentes, faciant auctoritate nostra illos eorundem præmissorum effectu pacificè frui, & gaudere, non permittentes eos desuper à quoquam quauis auctoritate quomodolibet indebitè molestari: Contradictores quoscunq; per censuras, & poenas Ecclesiasticas, aliaq; opportuna iuris, & facti remedia, appellatione postposita compescendo, inuocato etiam ad hoc, si opus fuerit, auxilio brachij sæcularis. Non obstan. fel: rec: Bonifacij Papæ VI I. Prædecessoris nostri de vna, & in Concilio Generali edita de duabus dietis, dummodò vltra tres dietas aliquis auctoritate præsentium ad iudicium non trahatur, alijsq; constitutionibus, & ordinationibus Apostolicis, cæterisq; contrarijs quibuscunq;. Volumus autem, vt præsentium transcriptis etiam impressis, manu alicuius Notarij publici subscriptis, & sigillo alicuius personæ in dignitate Ecclesiastica constitutæ munitis eadem prorsus fides habeatur, quæ eisdem præsentibus haberetur, si originaliter forent exhibitæ, vel ostensæ. Dar. Romæ apud Sanctum Marcum sub Annulo Piscatoris, die xxiiij. Augusti M. D C. V I I. Pontificatus Nostri Anno Tertio.

Scipio Cobellutius.

